

## Ўзбекистон-Туркменистон ҳамкорлигини ривожлантиришнинг барча йўналишлари муҳокама қилинди



Оммавий ахборот воситалари вакиллари билан учрашувда Президент Шавкат Мирзиёев музокаралар самарали ва сермазмун бўлганини, давлат раҳбарлари икки томонлама ҳамкорликни ривожлантиришнинг барча йўналишларини муҳокама қилганларини таъкидлади.

Ўзбекистон ва Туркменистон энг яқин қўшни, биродар мамлакатлар, вақт билан синалган ишончли дўст ва ҳамкорлардир.

- Туркменистон билан ҳамкорликда халқларимизнинг кўп асрлик дўстлиги, тарихий ва маданий ўхшашлиги, дини, маънавий қадрият ва анъаналари муштараклигига асосланган стратегик шериклик даражасига эришилганини юксак қадрлаймиз. Бугунги музокаралар натижалари ҳамкорликни янада мустаҳкамлашга интилишимиз самимийлиги ва қатъийлигини яна бир бор яққол кўрсатди. Биродар Туркменистон билан яхши қўшничилик муносабатларини янада мустаҳкамлаш Ўзбекистон ташқи сиёсатининг устувор йўналиши эканини алоҳида таъкидламоқчиман, - деди Шавкат Мирзиёев.

Давлатимиз раҳбари Ўзбекистон-Туркменистон муносабатлари, айниқса савдо-иқтисодий соҳада ижобий суръат билан ривожланиб бораётганини мамнуният билан қайд этди. Кейинги йилларда мамлакатларимиз ўртасидаги товар айирбошлаш уч баробар ортди. Пандемия оқибатларига қарамай, 2021 йилнинг ўтган даврида ўзаро савдо ҳажми йигирма беш фоизга ошди.

Бундан ташқари, ташриф доирасида ўтган Ўзбекистон-Туркменистон иқтисодий форумида келишувлар ва қатъий шартномаларнинг салмоқли тўплами имзоланди.

Президентимиз бугун имзоланган Чегараолди савдо зонасини ташкил этиш тўғрисидаги битим,

шунингдек, учинчи мамлакатларда келаётган импортнинг ўрнини Ўзбекистон ва Туркменистонда ишлаб чиқарилаётган ва икки мамлакат бозорларида талаб юқори бўлган рақобатбардош маҳсулотлар билан босишга доир келишув ўзаро савдони кўпайтиришга хизмат қилишини таъкидлади.

Саноат кооперациясини ривожлантиришга алоҳида эътибор қаратилди. Томонлар энергетика, қишлоқ хўжалиги, саноат, кимё, транспорт ва логистика соҳаларида ўзаро манфаатли ҳамкорликни кенгайтириш ва аниқ лойиҳаларни амалга оширишга келишиб олдилар.

Ҳудудлараро шерикликни фаоллаштириш масалалари ҳам муҳокама қилинди. Чегарадош вилоятлар ўртасидаги мунтазам бевосита мулоқот ҳамда ҳар йили Ўзбекистон ва Туркменистон ҳудудлари форумини ўтказиш иқтисодий ҳамкорликни ўстиришнинг янги драйвери бўлиб хизмат қилиши борасида яқдил фикр билдирилди. Бундай форматдаги илк учрашув келгуси йилда Хивада ўтказилади.

Давлат раҳбарлари транспорт соҳасидаги ҳамкорликни мустаҳкамлаш зарурлигини таъкидладилар. Ўзаро юк ташиш ҳажми ортганини қайд этиб, томонлар транспорт йўлакларидан самарали фойдаланиш учун бундан буён ҳам қулай шароитлар яратишга, шунингдек, Шимол-Жануб ва Ғарб-Шарқ йўналишларидаги ўзаро боғлиқликни мустаҳкамлашга хизмат қиладиган инфратузилмавий лойиҳаларни амалга оширишга келишиб олдилар.

Сув ресурслари ва экология мавзуси, иқлим ўзгариши масалалари мамлакатларимиз иқтисодиётлари учун ҳал қилувчи аҳамиятга эга. Шу муносабат билан Президент Шавкат Мирзиёев Сув хўжалиги масалалари бўйича Ўзбекистон-Туркменистон қўшма комиссияси ўз ишини бошлаганини мамнуният билан қайд этди.

Музокаралар кун тартибидан минтақавий хавфсизликни таъминлаш масалалари муҳим ўрин эгаллади.

Ўзбекистон ва Туркменистон Президентлари бутун Марказий Осиё минтақасининг барқарор ривожланишига таъсир кўрсатаётган Афғонистондаги вазият юзасидан фикр алмашдилар.

Шу маънода давлат раҳбарлари Марказий Осиё давлатлари раҳбарларининг Маслаҳат учрашувларини мунтазам асосда ўтказиб бориш ҳамда жорий йил 5-6 август кунлари Авазда ўтган учрашувда эришилган келишувларни амалга ошириш муҳим эканини таъкидладилар.

Етакчилар минтақавий ва халқаро тузилмалар доирасидаги яқин мулоқотни давом эттиришга келишиб олдилар.

Икки мамлакат маданий, илмий ва спорт доиралари ўртасидаги алмашинувларни давом эттириш, ёшлар учрашувлари ва форумларини ўтказиш, ёшлар ташкилотлари ўртасида яқин ҳамкорликни йўлга қўйиш муҳимлиги қайд этилди. Буларнинг барчаси биродар халқларимизни янада яқинлаштиришга хизмат қилади.

Томонлар тиббий дипломатиянинг мақсад ва вазифаларини биргаликда илгари суришга, мамлакатларимиз халқлари ва бутун минтақанинг хавфсизлигини таъминлаш учун ўзаро мувофиқлашга ёндашувни ишлаб чиқишга келишдилар.

Президент Гурбангули Бердимухамедов музокаралар натижаларидан мамнун эканини билдирди, икки томонлама ҳамкорлик масалаларининг кенг доираси юзасидан ишончли ва конструктив фикр алмашилганини таъкидлади.

- Ўзбекистон Туркменистоннинг муҳим савдо ҳамкорларидан бирidir. Ўзбекистонга бу галги расмий ташрифнинг асосий мақсади - ҳурматли Президент, менинг дўстим Шавкат Мирзиёевни, унинг раҳбарлигида мамлакатнинг давлат тизимида, ижтимоий-сиёсий ва социал-иқтисодий ҳаётининг барча соҳаларида амалга оширилаётган ислохотларни мен қатъий қўллаб-

қувватлашимни намоиш этиш, - деди Туркменистон Президенти.

Гурбангули Бердимухамедов Шавкат Мирзиёевга Туркменистон делегациясига кўрсатилаётган самимий меҳмондўстлик ва дўстона қабул учун миннатдорлик билдирди.









Манба